

趙城縣志卷十八

風俗

邑左山右河其民得山水勁直之氣性剽易怒甚者矜懣
枝逞獷獫敗始悔士內多穎秀外少文飾橫經者必負耒
風古已惟專務時藝經傳子史罕寓目焉是在有以倡之
耳地少沃壤而勤於稼穡婦女皆任耕作綺羅粉黛之飾
弗尙也商無逐貨於遠大者牛馬小者繩鐵錦文珠玉雖
入市鮮過而問者故以末致財者少土木金石之工尙贏
棄澤取凝惡敵不雕鏤不丹牖強爲之非敝則惡矣羊豕

雞鶩延上客不兼衣服少裘葛無冬夏皆着大布衣其陶唐氏之遺民歟惟務織悉錐刀之末靡不爭富者貸貧必令以房地爲質息少虧輒訟則重利之過也記曰奢示儉儉示禮化民成俗非守土之責哉

婚禮不納采不問名男女生年月日不相知也聘必以銀率二十四兩富豪者有加焉疑於論財矣婚之日婿往婦家再拜以婦歸日夕始入則以昏爲期之義也婦入門必抱織具及秤織者婦所有事秤謂取稱心無稽已無牀榻築土爲炕炕有竈旁祀竈神女主人書道經一部四字令

女置於神前以辟惡惡果以是辟耶厥明拜舅姑及妻
曰分大小翌日拜隣里曰看親皆近古至若婚之夕戚友
強壻與婦傳杯謂之鬧房甚或喧以鼓吹雜以號呶陋俗
相沿宜禁也

人死遷尸於牀沐浴更衣不紵不絞既卒歛奉尸夷於堂
棺實以棉并柏葉紙鏤之屬死者之齒及爪皆實之

生時所脫

落者次日設靈牀成服主人斬衰苴杖奠無算哭無時賻者

以米飯七日主人復設奠鼓於門親屬皆至曰做七每七
日皆如初四十九日乃止將葬擇啟期營兆宅葬之前日

主人設奠親屬各致奠主人哭踊無數傷舉柩也厥明遷
柩就輦弔者皆執紼婦人哭送於路至壙瘞芻馬紙衣乃
窆主人哭踊無數哀親之在外也既窆反祭於殯宮卽古
虞祭禮墓成祀后土親屬皆拜墓慶魂之得所歸也嗣是
而練而祥而禫皆如制居喪之日不飲酒不食肉不御內
哭必盡哀孝之至也可異者葬日必多延弔客奠物取豐
惡非送殯必以鼓樂非是謂之黑葬爲不孝貧者力不能
給多停葬者稱家有無謂何矣富家治喪必擇顯者題主
費恒不貲他若延僧道誦經演佛劇尤失禮當盡擯之

禮士庶人得祀其祖父母父母於寢重報本也俗多無家
廟歲時各祭於其家七月望十月朔皆祭時薦之義也既
春分擇日拜墓焚五色紙男婦皆哭新塋者不哭恐傷死
者之心也清明不拜墓俗言樂戶以是日祀祖先故避之
謬說耳忌辰薦於寢忌日必哀之意也生辰亦祭焉近古
矣惟尙淫祀村必有廟醮錢歲課息以奉神享賽必演劇
祭物以首承之而進拜跪無常儀饗獻無常數婦女老幼
什伯爲羣雖禁之弗戢則道家祈禱之說階之厲也

元旦鳴爆竹祀神及祖卑幼拜尊長次拜親屬曰拜年三

日爲三姑三母家迎女及壻五日以箕畚糞壤於門外曰
送窮或棄敝帚義一也上元熾炭於庭中曰興旺火不張
燈好事者間爲之未二鼓燭熄矣十六日戴栢葉男婦皆
出遊曰遊百病一遊而百病可除也男子遊可耳婦人不
踰閨闥亦藉口除病耶穀雨粘畫蝎於牆咒之曰送蝎端
午戴艾葉曰去疾飲雄黃酒曰避毒男女繫五色絲於腕
曰龍蛇不螫續齊諧記載五日祭屈原以綵絲纏祭物投
之江蛟龍不敢近此其遺意歟七月七日童子浸穀於盆
使生萌命曰蘼母及旬取爲水角裹筆頭於內嚙之視穎

之向背以別慧鈍女子則易以針從所有事也中秋陳瓜餅於庭曰饗月九月九日食棗糕母家饋女曰祝節臘月五日至八日煮五色豆食之曰臘八粥先薦祖臘祭之義也二十三日祀竈以糖曰粘其口使毋說是非口果粘苟有善亦無以達於天矣自是七日嫁娶不擇吉日諸神在天無禁忌除夕老幼男婦具酒饌醵飲曰守歲獻神之物取食之不使人知曰可無齒病是皆俗所競尙多不經備錄之俟採風者

方言

附

民隱之悉於上也必言語以爲之階管子云五方之民其聲之清濁高下各象其川原泉壤故其音不能無偏非平時繹而通之有值訴謁而茫然莫解者矣邑之方言如父曰爸母曰家妻曰媳婦子曰厮兒夫曰漢家祖曰爺爺祖母曰娘娘外祖曰老爺爺外祖母曰老娘娘妻兄曰室兄弟妻曰弟妹稱人妯娌曰襄婦頭曰登腦眼曰眼窩家中曰居舍同事曰連手代人奔走曰跑事年老曰上歲同行曰厮趕知曰悉下不知曰悉不下無曰沒收拾曰拾奪執

物曰荷一箇曰一塊嫁曰改趕曰攢難受曰佳不得以手
比勢曰等想曰擬摹事無傷損曰百不怎的不理會曰不
細顧耕地曰疊地添火曰擡火筆曰生花麪條曰旗子石
曰堆石繩曰麥束牲畜曰頭口皆有音可釋有義可通雖
其聲之疾徐輕重間有不齊可意揣而得也他若湯之爲
拖也狼之爲羅也名之爲滅也閭之爲揚也杏之爲恨也
號之爲侯也睡之爲樹也桑之爲梭也外之爲衛也廳之
爲添也母之爲墨也來之爲雷也王之爲禾也跪之爲出
也去之爲棄也則介在疑似審音者猶能辨之若夫布曰

纂年樹曰薄兒杖曰格闌口袋曰尺頭女子髻曰格爪稱人連襟曰挑擔乳曰麥麥立曰勾躡曰圪塥看曰說身倦曰乖罵曰捲臥曰貼以手掩物曰烏妥當曰實熟彼此撲跌曰姑闌之類街談巷說有令人聽之而生回惑者蓋其入性懷急故其音多短促而少清揚言爲心聲信夫予始至邑凡士民童婦所云云必默識之凡乃漸得其音之所近每升廳事時復效其傾吐不待反覆究詰而皆能喻其意善夫陸稼書之言曰今之仕者皆東西南北之人語言未通何論人情焉後之君子審求於一話一言毋使入於

耳者慴於心未必非畱心民事之一助也

五

趙城縣志卷十九

物產

冀州穀宜黍稷邑有黍而無稷或云黍稷本一類但種微異耳

高粱非梁也梁卽今之粟米亦曰小米土人又呼穀子邑中穀屬最多者麥及豆而外粟亦其次也

稻米產太原晉祠者佳其次本邑亦有二種東鄉者霍水性柔食之和中西鄉者汾水力大食之益氣

冬莧馬齒莧皆莧別種馬齒莧卽易之莧陸冬莧一名鴨

脚葵江淮以南多種之邑中聽其野生而已亦無採而食者

茄有一種白色者小於常茄初結時酷類鵝卵圓潔可玩及老色漸黃但不可食耳

天水穀有紅白兩種紅者根葉及實皆紅白亦是土人收其實以爲糖可入茶品

西瓜較他處遲熟產西鄉者尤遲五六月民間鬻取者皆非本地產也舊時邑令常取以餽上官每瓜時責民供獻民不勝擾予蒞任後罷除之

苦瓜種與南方異身短而多刺雖南人攜種來種之亦變也土人亦鮮食之

柿四鄉皆有之而附郭尤多秋冬之際丹實離離益以霜葉一望鮮明爛如披錦勝景也種柿之法先以布袋盛核浸溷坑中數十日取出種之則樹易成而多實

霍山勝概松柏爲最大者八九人圍隋開皇中詔霍山多植松柏今蓋其遺種也松皆白皮愈老愈潔柏則廣勝寺及女媧廟爲多俗傳廣勝柏枝皆南向今驗之殊不然齊民要術云凡地不任稼穡者則令種棗土人凡隙地無

走城縣志 卷一
不種此者得古之遺意矣

靈棘產縣西石明村藺相如墓上俗言童子入學佩之多
聰慧

窪地不任稼穡者多產蘆葦謂之葦地始生曰蘆旣老曰
葦蘆筍可食葦稽可編箔皆民之所利也

南人耕用牛北人則兼用騾馬及驢雖貧家無不畜者

格列生松柏上首似鼠而尾大喜食柏葉

野兔形似常兔惟尾較粗肉亦酸不甚適口土人名爲玉

兔

蜀葵俗呼映日紅南人謂之一丈紅邑中凡舍旁隙地無不有此四五月開花一望紅白相間

菊僅有白色一種初開色微黃漸轉爲白開竟則淡紅矣花朵亦甚小

石雞色蒼較雉微小薄切之可作羹亦野味之佳者

香枝出後河頭村瀕渠人採山中柏木浸水中俟其透研爲屑以作香

鹿之別種曰麇子霍山多有之

水族鼈爲多魚蝦之屬亦常有之然土人不諳網罟捕食